



**CONVENIO PARA O APOIO AO MANTENIMENTO DA REDE DE MULLERES VECIÑAIS CONTRA OS MALOS TRATOS DE VIGO. 2015**

**REUNIDAS**

Dunha parte, don Abel Caballero Álvarez, na súa calidade de Alcalde do Concello de Vigo.

Doutra, dona María Rosario Otero Rodríguez, como presidenta da asociación Rede de Mulleres Veciñais contra os Malos Tratos de Vigo, con CIF nº G36928646 e enderezo social na rúa Oliva, 12 Vigo, na representación da mesma, segundo resulta dos seus estatutos e da certificación da súa secretaría que figura na documentación do expediente núm. 6669- 224.

Tendo, daquela, as persoas comparecentes a capacidade legal necesaria para o outorgamento do presente convenio

**MANIFESTAN**

I. Que desde o ano 1997 un grupo de mulleres vinculadas ao movemento veciñal ven traballando de xeito solidario na prevención e axuda ás mulleres maltratadas. No mes de novembro de 2003, esta rede de mulleres constituíuse nunha Asociación independente e autónoma baixo o nome "Asociación Rede de Mulleres Veciñais contra os Malos Tratos de Vigo" formalizando a súa inscrición no Rexistro de Asociacións da Xunta de Galicia e do Concello de Vigo.

Esta asociación a forman un grupo organizado de mulleres vinculadas ás asociacións veciñais que apoian e acompañan ás mulleres no proceso de concienciación e ruptura cos malos tratos, constituíndose nun referente social de denuncia e de mobilización contra a violencia de xénero. As mulleres que forman parte da rede traballan de xeito voluntario como mediadoras e reciben unha formación específica impartida por profesionais do ámbito psico-social, xurídico, e policial.

Os fins da Rede de mulleres veciñais, como contemplan os seus estatutos, son entre outros:

- Traballar na prevención dos malos tratos
- Asistir ás mulleres maltratadas en todas as situacións que sexa necesario
- Difundir os valores de igualdade entre as persoas sen discriminación por razón de xénero, defender os dereitos e intereses das mulleres maltratadas.
- Potenciar o benestar social e a calidade de vida das mulleres realizando os estudos e propoñendo as medidas políticas precisas aos órganos da administración.

II. Que o Concello de Vigo conta cunha rede de servizos e recursos específicos para as mulleres. Por unha banda, existe un centro de atención global e específica á muller, que é o Centro Municipal de Información dos Dereitos da Muller, onde diferentes profesionais reciben as demandas e traballan directa e planificadamente coas mulleres e unha rede municipal de acollemento, formada polo Centro de Emerxencia e por tres vivendas de protección para mulleres vítimas de violencia de xénero. Por outra banda, Vigo é unha cidade historicamente estruturada en barrios cunha dinámica e servizos comunitarios propios e descentralizados (culturais, asociativos, de saúde...), onde as mulleres teñen representatividade formal e informal na vida cotiá do barrio a través de asociacións de base que lles permiten o coñecemento a fondo da realidade.





Considerando que os fins da Asociación Rede de Mulleres Veciñais contra os Malos Tratos de Vigo cumpren os obxectivos da concellería de Igualdade en prol da igualdade de oportunidades e máis especificamente contra a violencia que sofren as mulleres, valérase oportuno que o Concello de Vigo apoie esta iniciativa de carácter solidario baixo a fórmula dun convenio de colaboración.

III. Así as cousas, o Concello de Vigo no seu vixente orzamento, na partida 2311 4890004 prevé nominativamente a concesión dunha subvención por importe de 15.300,00€, a favor da Asociación Rede de Mulleres Veciñais contra os malos tratos de Vigo .

IV. Toda vez que, de acordo co disposto nos artigos 28.1 da Lei 38/2003, de 17 de novembro, xeral de subvencións e 26.1 da Lei 9/2007, o convenio será o instrumento habitual para canalizar as subvencións previstas nominativamente nos orzamentos da Administración concedente, as intervinentes, conclúen o presente convenio ao fin de regular os termos da concesión da devandita subvención, cuxo obxecto é apoiar o mantemento da entidade e o desenvolvemento de actividades da Asociación Rede de Mulleres Veciñais contra os Malos Tratos de Vigo durante o exercicio 2015.

V.- Que a Asociación Rede de Mulleres Veciñais contra os Malos Tratos de Vigo non está incursoa en prohibición para ser beneficiaria das subvencións obxecto da Lei de subvencións de Galicia, segundo resulta da declaración responsable que figura neste expediente como Anexo III.

VI. Que a Asociación achase ao corrente das súas obrigas tributarias e fronte a Seguridade Social e non ten débedas pendentes con este Concello de Vigo, segundo resulta das certificacións que figuran no expediente.

VII. Que en base ás precedentes consideracións e ao interese social que para a cidade de Vigo representa a devandita actividade da Asociación Rede de Mulleres Veciñais contra os Malos Tratos de Vigo , o Concello de Vigo e dita asociación conveñen a súa colaboración no ámbito da promoción da igualdade e a concesión da referida subvención en base aos seguintes.

## PACTOS

**Primeiro.-** O obxecto deste convenio é apoiar á Asociación Rede de Mulleres Veciñais contra os Malos Tratos de Vigo segundo os obxectivos e actividades que desenvolve dita asociación durante o exercicio 2015, segundo o programa que se incorpora ao convenio como Anexo I.

As accións obxecto deste convenio están dirixidas a todas as mulleres de Vigo que sofren violencia de xénero e que manifesten o seu desexo de ser axudadas pola Asociación Rede de Mulleres Veciñais contra os Malos Tratos de Vigo.

A Asociación Rede de Mulleres Veciñais contra os Malos Tratos de Vigo comprométese a colaborar coa concellería de Igualdade no marco deste convenio e dotará ás mulleres voluntarias da entidade de aqueles mecanismos sociais de apoio a vítima, para asistir os casos de vítima de violencia de xénero: especialmente ó colectivo de mulleres usuarias da rede municipal de acollemento: Centro de Emerxencia e vivendas de protección, xa que estas mulleres deron un paso de vital importancia para saír dunha situación de violencia e agora necesitan o máximo apoio e reforzo para superar esta difícil situación. A Rede de Mulleres Veciñais, como organización non lucrativa, comprométese, ademais das actividades que xa leva a cabo recollidas no anexo I, co colectivo de referencia (mulleres usuarias dos dispositivos de acollemento), ampliar as súas competencias a todo tipo de acompañamentos como poden ser: consultas médicas, actividades de lecer, sociais, relacionais, comunicativas, etc.





Un dos obxectivos perseguidos pola Rede de Mulleres Veciñais contra os Malos Tratos de Vigo é o fortalecemento persoal da vítima paliando a soedade e angustia, transmitíndolle apoio e confianza, co fin de acadar a integración da muller en todos os ámbitos da vida.

Procederase á atención e acompañamento necesario aínda que as mulleres non sexan veciñas de Vigo nos casos derivados polo servizo municipal do Centro Municipal de Información dos Dereitos das Mulleres.

A Asociación Rede de Mulleres Veciñais contra os Malos Tratos de Vigo comprométese a colaborar coa concellería de Igualdade do Concello de Vigo concretamente, a:

- 1.- Asumir todo o concernente á organización xeral das actividades obxecto do convenio, achegando a infraestrutura e o equipo humano necesario para tal fin, así como cumprir o programa que figura como Anexo I.
- 2.- Asumir todos os gastos que se deriven da organización destas actividades e obter todos os permisos e autorizacións para a súa realización.
- 3.- Garantizar o dereito á confidencialidade das beneficiarias utilizando claves que convirían en anónimos os datos recollidos. Fixará limitacións de acceso ás mesmas e incluírá unha cláusula de confidencialidade nas persoas que traballen ou colaboren na Asociación.
- 4.- Todas as actividades desenvolvidas pola Asociación na execución deste convenio deberán estar amparadas ou cubertas de toda clase de continxencias derivadas da referida execución, por efecto dela ou con ocasión da mesma; a través das necesarias relacións de aseguramento, social ou privado, que contemplan a asistencia sanitaria, accedentes de traballo e demais prestacións do sistema de seguridade social así como da posible responsabilidade civil.
- 5.- A persoa ou persoal que preste servizos na Asociación Rede de Mulleres Veciñais non manterá relación laboral nin contractual co Concello de Vigo.
- 6.- As obrigas da Asociación rede de Mulleres Veciñais contra os Malos Tratos de Vigo, como beneficiaria da axuda, serán, ademais das estipuladas nos apartados anteriores, as consignadas no artigo 11 da Lei 9/2007 do 13 de xuño, de subvencións de Galicia e no artigo 14 da Lei 38/2003, do 17 de decembro, xeral de subvencións e o RD 887/2006, de 21 de xullo, polo que se aproba o Regulamento da citada Lei.

**Segundo.-** O Concello de Vigo, pola súa parte comprométese a:

- 1º.- Aportar a documentación técnica precisa como a guía de recursos e a atención profesional especializada a través do persoal do Centro Municipal de Información dos Dereitos da Muller.
- 2º.- Incluir este servizo entre os servizos especializados no eido da promoción da muller que difunda mediante campañas de publicidade.
- 3º.- Conceder directamente á Asociación Rede de Mulleres Veciñais contra os Malos Tratos de Vigo, unha subvención por importe de 15.300,00€ co obxecto de coadxuvar á financiación da colaboración no ámbito da promoción da igualdade e do tratamento contra a violencia de xénero.





**Terceiro.-** Esta subvención será compatible con calquera outra subvención ou axuda para a mesma finalidade procedente de calquer outra administración ou de entes públicos ou privados, nacionais, da Unión Europea ou de organismos internacionais.

A beneficiaria deberá comunicar ao Concello de Vigo a obtención doutras subvencións, axudas, ingresos ou recursos que financien a actividade subvencionada. Esta comunicación deberá efectuarse no momento en que se coñeza e, en todo caso, con anterioridade a xustificación da aplicación dada ós fondos recibidos.

En calquera caso, o importe total da subvención ou subvencións non poderá superar o da actividade subvencionada; caso no que se procederá na forma prevista no artigo 34 do RD 887/2006, de 21 de xuño, polo que se aprobou o Regulamento da Lei Xeral de Subvencións.

**Cuarto.-** O Concello de Vigo abonará o importe da axuda en tres partes:

- a) A primeira, por importe de 5.000,00€ coa firma do presente convenio, anticipo motivado para facer fronte aos gastos xerados polo comezo das accións desta entidade sen ánimo de lucro.
- b) A segunda por importe de 5.000,00€ no mes de xuño, previa a entrega do informe de avaliación das actividades e xustificantes orixinais de gasto polo importe a aboar.
- c) A terceira por importe de 5.300,00€ no mes de decembro previa a certificación do departamento de igualdade acreditando o cumprimento do convenio unha vez se achegue a memoria anual da asociación e xustificantes orixinais de gasto do resto da subvención pendente de xustificar.

Antes de proceder a cada pago da subvención a beneficiaria deberá acreditar estar ao corrente no pagamento das súas obrigas fiscais e para coa seguridade social e non ser debedora por resolución de procedencia de reintegro, o que poderá realizar por medio dunha declaración responsable, ao abeiro do artigo 31.7 e) da lei 9/2007 de subvencións de Galicia.

**Quinto.-** Se o custe total da actividade subvencionada resultase ser menor que o contemplado para a concesión da subvención ou se reduciran na execución da actividade subvencionada as actuacións ou elementos previstos como integrantes da mesma, procederá a redución da subvención na mesma proporción .


A comunicación destas circunstancias ao Concello deberá efectuarse no momento en que se coñeza e, en todo caso, con anterioridade a xustificación da aplicación dada aos fondos recibidos.

**Sexto.-** A beneficiaria poderá subcontratar con terceiros ata un 80% do importe da actividade subvencionada.

A entidade non pode concertar con terceiros/as a execución das actividades que constitúen a prestación voluntaria e solidaria dos acompañamentos ás mulleres vítimas de violencia. A beneficiaria está autorizada a concertar con terceiros/as as actividades que non sexan prestacións de carácter persoal, como son: actividades de formación, desprazamentos, publicidade..., segundo o previsto no artigo 29 da Lei Xeral de Subvencións.

Non poderan ser subcontratistas as persoas ou entidades a que se refire o apartado 7 do artigo 27 da Lei de subvenciones de Galicia.





**Sétimo.-** Para o seguemento e avaliación do presente convenio de colaboración establécese unha comisión de seguemento e avaliación que, presidida pola concelleira de Igualdade estará formada, previo nomeamento da Presidenta, por:

- A presidenta e coordinadora da Rede de Mulleres Veciñais contra os malos tratos de Vigo ou persoas en quen deleguen.
- A xefa do Servizo Municipal de Igualdade.
- Unha técnica do Centro Municipal de Información dos Dereitos da Muller

Actuará como secretario/a da comisión un/ha dos/as vogais designado/a por ésa.

**Oitavo.-** A beneficiaria debe dar a adecuada publicidade á financiación municipal da actividade subvencionada mediante a inserción en lugar visible o logo da concellería de Igualdade e do Concello de Vigo en canto material escrito e audiovisual se edite.

**Noveno.-** Antes do 10 de decembro de 2015, a beneficiaria deberá xustificar o cumprimento da finalidade para a que se concedeu a subvención e, no seu caso, da aplicación dos fondos recibidos.

A xustificación deberá facerse con documentos orixinais pola parte subvencionada e con copias das facturas polo resto do orzamento. Se poderá substituír a presentación de copias de facturas polo gasto do proxecto ou actividade non subvencionada pola presentación dun balance que abarque a totalidade do gasto ou por unha certificación que acredite que o programa ou actividade que foi obxecto da subvención foi executado na súa totalidade e o seu custo total foi de 16.300,00€ (gasto total do proxecto segundo reflicte o orzamento presentado pola entidade).

A tal efecto deberá presentar unha conta xustificativa na que deberá constar a declaración das actividades realizadas e dos gastos incorridos, tal e como se indica no parágrafo anterior xunto cunha relación de todos os xustificantes de pago dos gastos incorridos que fosen financiados coa axuda concedida nesta convocatoria acompañando as facturas ou documentos de valor probatorio equivalente á conta da subvención concedida. Ademais, a entidade deberá declarar o importe, procedencia e a aplicación dos fondos propios e outras subvencións ou recursos que financiarán tamén a actividade subvencionada.

As facturas, que serán orixinais, deberán recoller o número de CIF, a data, número de factura e o IVE, estes xustificantes quedarán a disposición do Concello de Vigo. Non se admitirán facturas fotocopiadas ou compulsadas, nin aquelas que non reúnan as esixencias previstas no RD 1619/2012, de 30 de novembro, polo que se aproba o Regulamento polo que se regulan as obrigas de facturación en vigor desde o 1 de xaneiro de 2013. Nestas facturas se computará o gasto acreditado deducindo o IVE, salvo que se xustifique a exención do dito imposto. Non será preciso que nos documentos xustificativos de pago conste de forma expresa que os pagos aos que os mesmos se refiren foron satisfeitos con anterioridade ao proceso de xustificación do cumprimento da finalidade para a que se concedeu a subvención.

Se a beneficiaria solicitara a devolución do orixinal presentado, a área xestora da subvención procederá ao estampillado da factura orixinal, indicando no estampillado o motivo da subvención e si o importe do xustificante impútase total ou parcialmente á subvención recibida; indicándose neste caso o importe exacto que resulte afectado pola subvención. A copia do xustificante orixinal estampillado se incorporará ao expediente e a área xestora da subvención procederá á devolución do orixinal.





A axuda do Concello de Vigo incluírá tanto os consumos (teléfono, luz, distribución postal) como o abono de salarios, publicidade e os gastos de formación e desprazamento das medidoras, atendendo ao especificado no orzamento elaborado pola entidade para o ano 2015. Anexo II.

Os custos indirectos formarán parte da xustificación da subvención, sempre que se imputen á actividade subvencionada na parte que razoablemente corresponda de acordo cos principios e normas de contabilidade xeralmente admitidas e, en todo caso, na medida na que tales custos correspondan ao período no que efectivamente se realiza a actividade.

Xunto coa documentación relativa á conta xustificativa, a entidade achegará unha memoria semestral e outra anual sobre as actividades desenvolvidas no marco deste convenio.

**Décimo.-** Serán gastos subvencionables os que de xeito indubitado respondan a natureza da actividade subvencionada e se realicen desde o 10 de decembro de 2014 ata o 9 de decembro de 2015.

**Décimo primeiro.-** A axeitada xustificación da subvención, a realización da actividade subvencionada e o cumprimento da finalidade que determinou a concesión desta, será comprobada polos servizos da Concellería de Igualdade. A xefa do servizo de Igualdade emitirá informe ao respecto acreditando o cumprimento do convenio ou facendo constar, no seu caso, todas aquelas circunstancias que poidan resultar relevantes en orden a considerar incumprida ou defectuosamente cumprida a actividade subvencionada. O informe do órgano xestor incorporárase á conta xustificativa.

**Décimo segundo.-** A beneficiaria deberá facilitar toda a información que lle sexa requirida pola concellería de Igualdade e pola Intervención Xeral Municipal, Tribunal de Contas e Consello de Contas no exercizo das súas funcións de fiscalización e control do destino das subvencións.


**Décimo terceiro.-** Procederá o reintegro das cantidades percibidas e a esixencia de xuros de demora desde o pagamento da subvención ata a data na que se acorde a procedencia do reintegro nos casos do artigo 33 LSG.

Cando o incumprimento da actividade subvencionada se traduza nunha diminución significativa da actividade subvencionada, traducible a termos económicos en función do proxecto presentado e o seu presuposto, que non implique verdadeiro incumprimento do obxectivo da subvención, procederá o reintegro da subvención na mesma proporción. En todo caso procederá o reintegro do exceso da subvención sobre o custo da actividade subvencionada.

**Décimo cuarto.-** Canto ás infraccións e sancións en que poida incurrir a beneficiaria da subvención a que se refire este convenio e procedemento para a súa aprezação e imposición, estarase ao disposto no Título IV da Lei 9/2007, de 13 de xuño, de subvencións de Galicia e no RD 1398/1993, de 4 de agosto, polo que se aprobou o Regulamento do Procedemento para o exercicio da potestade sancionadora.

**Décimo quinto.-** A beneficiaria está informada de que que os seus datos serán incorporados aos ficheiros municipais; de que a finalidade da súa recollida é a instrución do procedemento para a concesión da subvención obxecto do presente convenio, a práctica das publicacións, comunicacións e notificacións de obrigado cumprimento, o seguimento e comprobación da





actividade subvencionada e demais actuacións previstas na Lei de subvencións de Galicia en orden á conclusión do proceso subvencional, polo que a súa achega é obligatoria.

Os ditos datos serán tratados e protexidos de acordo co previsto na Lei 30/1992, do 26 de novembro de Réxime Xurídico das Administracións Públicas e do Procedemento administrativo Común e na Lei 15/1999, do 13 de decembro, de Protección de Datos de Carácter Personal, sendo responsable do seu tratamento a Concellería de Igualdade.

A beneficiaria poderá exercer os dereitos de acceso, rectificación, cancelación e oposición ante a Concellería de Igualdade do Concello de Vigo.

**Décimo sexto.-** A concesión da subvención obxecto do presente convenio rexerase pola Lei 38/2003 do 17 de novembro, xeral de subvencións e o RD 887/2006, de 21 de xuño, polo que se aprobou o seu regulamento, nos seus preceptos básicos; a lexislación básica do estado en materia de réxime local; a Lei 9/2007, de 13 de xuño, de subvencións de Galicia; os preceptos non básicos da Lei 38/2003 e do RD 887/2006; polos pactos que se conteñen neste convenio; as Bases de Execución do orzamento municipal e as restantes normas de dereito administrativo, e no seu defecto, as normas de dereito privado.

E, en proba da súa conformidade, firman o presente convenio, por triplicado exemplar, en Vigo o 13 de abril de 2015.

O Alcalde de Vigo

Abel Caballero Álvarez

A Presidenta da Rede de Mulleres  
Veciñais contra os Malos Tratos de Vigo

María Rosario Otero Rodríguez





### CALENDARIO DE ACTIVIDADES 2015

As actividades da Rede teñen como obxectivo cubrir as demandas e necesidades que día a día plantexan as mulleres que se achegan á Asociación, polo que dende o ano 1998 traballamos na prevención e asistencia ás mulleres que sofren malos tratos, así como na formación e información das mulleres en materia de violencia de xénero.

O traballo que ímos desenvolvendo, sempre realizado dende unha perspectiva de xénero, enmárcase en catro eidos:

- **A concienciación e prevención**, difundindo os valores de igualdade entre as persoas, con especial incidencia nos centros de ensino e nas familias, fomentando a coeducación.

- **Reincorporación social**, promovendo o benestar e a mellora da calidade de vida das mulleres, a través de proxectos que abarcan a área psicolóxica, física e social.

- **Asistencia e o acompañamento** a mulleres que sufran violencia de xénero reforzando a rede dos servizos sociais municipais.

- **A formación** en materia de xénero, promovendo foros e cursos de formación.

Dende a experiencia adquirida en anos de traballo, tanto na atención directa ás mulleres (ás que atendemos, asesoramos e acompañamos) como na análise da realidade da situación da violencia de xénero e do contexto social onde ésta ten lugar, podemos constatar a importancia que adquiren as accións preventivas, de detección temperá, de capacitación das e dos profesionais e das necesidades da mobilización social, para a concienciación e eliminación da violencia de xénero.

O traballo e as actividades que a Asociación ven desenvolvendo en anos anteriores e que ten previsto realizar no ano 2014, son as seguintes:



## ATENCIÓN ÁS MULLERES

---

De maneira xeral a Rede realiza múltiples actividades de concienciación e prevención, reincorporación social, asistencia, acompañamento e formación, pero ademáis mantén uns servizos activos durante todo o ano, os cales son os seguintes:

### - PUNTO INFORMA:

Orientación, atención e derivación, se fose necesario, ás entidades especializadas en función da súa situación. Existe un teléfono de atención a disposición das mulleres, activo todos os días da semana, de 9 a 23 hs.

O punto informa permanece aberto mañán e tarde co seguinte horario


Mañáns: 10:00 –13:30

Tardes: 17:30 –21:00

### - ACOMPANÑAMENTOS:

#### 1. A TRÁMITES LEGAIS:

 Acompañamento ás mulleres naqueles trámites legais que precisen iniciar: avogacía, policía, servizos de saúde, etc.

 2. Ó INTERCAMBIO DE NENAS/OS - NAIS/PAIS: Servizos de acompañamento para as mulleres ó intercambio de nenas e nenos co obxectivo de cumprir as visitas asignadas a cada proxenitor.

Préstase especial atención ós servizos realizados ós Puntos de Encontro.

#### 3. A XUÍZOS:

Asistencia a xuízos en causas de violencia de xénero, acompañando ás mulleres que así o desexen.

#### 4. SEGUIMIENTO DOS CASOS ATENDIDOS

Seguimento dos casos atendidos, mantendo contacto frecuente coas mulleres para coñecer a súa evolución e axudala no que precise, así como para avaliar o funcionamento da Rede e a adecuación dos servizos recibidos nos centros de derivación.

Cada caso atendido é rexistrado cumprimentando unha ficha na que se recollen e tratan con carácter confidencial os datos persoais das mulleres, a situación no momento da consulta, a intervención realizada, os resultados obtidos e o seguimento efectuado.

#### REINCORPORACIÓN E APRENDIZAXE PSICO-SOCIAL

A Rede nace como entidade para acompañar ás mulleres nos seus procesos de ruptura cos malos tratos pero tamén para a súa recuperación integral, polo que realizamos diversas actividades terapéuticas:

- Encontro Terapéutico con mulleres: grupo de axuda mutua guiado por unha psicóloga clínica.

- Intervención socio-cultural: Saídas culturais e de ocio. En colaboración coa Asociación "Solidario Anónimos".

Acuden mulleres atendidas pola Rede, voluntarias, así como mulleres do Centro de Emexencia da cidade de Vigo e parte do seu persoal técnico.

#### CONCIENCIACIÓN SOCIAL

A Rede realiza sucesivas campañas de divulgación e de concienciación social co obxectivo de implicar a toda a sociedade na eliminación da violencia:

- *Información* ás diferentes organizacións.
- *Ponencias e xornadas*.
- *Obradoiros formativos* nos institutos de Vigo.
- *Videofórumns mensuais*.

- Realización das mesas informativas da campaña contra a violencia de xénero con motivo do 25 de novembro, día internacional contra a violencia de xénero.
- Concentracións mensuais.
- Aportacións teóricas e participación activa.
- Presenza nos medios de comunicación.
- Campaña postal na rúa "Postalfree": "Tí Cortas os Fíos".
- Mantemento do Blog.
- *Detección e denuncia polo tratamento mediático da imaxe das mulleres en xeral, e en casos de violencia de xénero en particular.*

### **FORMACIÓN EN XÉNERO E VIOLENCIA DE XÉNERO**

---

A formación é un dos piares fundamentais da Rede para a eliminación da violencia, prestando especial atención á formación das persoas que traballan máis directamente coas mulleres.

O noso obxectivo é que toda a sociedade poida detectar os malos tratos no ámbito persoal interno, requisito para a súa prevención nas relacións afectivas e sociais e profundizar e concienciar dentro de cada campo de acción social da necesidade dunha visión dende a perspectiva de xénero, a nivel persoal, social e laboral.

As **actividades** a levar a cabo son as seguintes:

- *Curso formación de mediadoras en violencia de xénero.*
- *Formación permanente das persoas voluntarias da asociación.*
- *Encontros de debates feministas.*
- *Camiños ó Bo Trato: sesión formativas sobre xénero e violencia de xénero, a diferentes colectivos entre os que se atopan:*
  - nais/pais/titores.
  - grupos profesionais.
  - asociacións, vogalías, colectivos etc.
  - mulleres e homes.

- mocidade.

As temáticas a tratar son as seguintes:

- Estereotipos sociais e culturais.
- Evolución da personalidade. Identidade feminina e masculina. Malos Tratos: vínculo e ciclos.

- Persoa maltratadora perfil e estratexias de violencia.
- Nenas/os, mozas como vítimas de violencia.
- Detección temperá.

---



### COOPERACIÓN SOCIAL

---

A Rede de Mulleres Veciñais participa de maneira activa en numerosas actividades relacionadas coa problemática da violencia de xénero.

Co obxectivo de levar a cabo unha intervención máis eficaz e eficiente traballamos en rede coordinándonos con asociacións sen ánimo de lucro e con diferentes institucións:

- Colaboración coa Universidade de Vigo: Proxecto europeo para a tradución e interpretación en violencia de xénero.
- Proxecto "Atalanta", proxecto para a igualdade de xénero e conciliación da vida laboral e familiar, xunto coa Fundación José María De Llanos, De Madrid, Realización de xornadas de formación e intercambio de experiencias para profesionais que traballan en violencia de xénero.
- Participación no Consello Municipal das Mulleres da cidade de Vigo.
- Participación na Marcha Mundial das Mulleres.
- Organización do 8 de marzo, Día Internacional das Mulleres.
- Participación en manifestacións e concentracións en prol dunha sociedade máis xusta para toda a cidadanía.
- Participación na Plataforma galega polo dereito ao aborto.



Asdo. Rosalía Otero Rodríguez  
Presidenta da Rede



ASOCIACIÓN REDE  
DE MULLERES VECIÑAIS  
CONTRA OS MALOS TRATOS  
DE VIGO

ANEXO II


ORZAMENTO ANO 2015

GASTOS PREVISTOS

DESPLAZAMIENTOS DOS ACOMPAÑAMENTOS AS MULLERES VITIMAS	1.200,00 €
MATERIAL FUNXIBLE	1.615,00 €
COMUNICACIÓNS (TELÉFONO, CORREOS)	1.200,00 €
PUBLICIDADE	500,00 €
RECICLAXE DE MEDIADORAS	900,00€
SEGURO DA ASOCIACIÓN	129,35 €
GASTOS DE XESTIÓN DE ASESORÍA	550,00 €
PERSONAL APOIO ADMINISTRACIÓN	8.205,65 €
FORMACIÓN EN VIOLENCIA DE XÉNERO PARA A INCORPORACIÓN DE NOVAS MEDIADORAS	2.000,00 €
<b>TOTAL</b>	<b>16.300,00 €</b>

INGRESOS PREVISTOS

INGRESOS PROPIOS DA ORGANIZACIÓN	1.000,00 €
CONVENIO CONCELELTERÍA DE IGUALDADE	15.300,00 €
<b>TOTAL</b>	<b>16.300,00 €</b>



Asda. Mariñe Lago Fontenla  
Secretaría da Rede

Vigo, 04 de febreiro do ano 2015

Anexo III



ASOCIACIÓN REDE  
DE MULLERES VECIÑAIS  
CONTRA OS MALOS TRATOS  
DE VIGO


C.I.F. G-36928646

Dña **Matilde Lago Fontenla**, titular do NIF 35.920.625-F, en calidade de secretaria da entidade Rede de Mulleres Veciñais Contra Os Malos Tratos de Vigo, con CIF G-36928646 e con enderezo en rúa Oliva, 12-2º, Vigo

### DECLARA

- 1º.- Que a Entidade non está incursoa en ningunha das circunstancias que figuran no art.13 da Lei 38/2002, de 17 de novembro, Xeral de Subvencións ou no artigo 10 da Lei 7/2007 de 13 de xuño, de subvencións de Galicia.
- 2º.- Que á Asociación non se lle concederon outras axudas ou subvencións para a mesma finalidade.

En Vigo, a 15 de xaneiro do ano 2015.



**Asdo. Matilde Lago Fontenla**  
**Secretaría da Rede**